

Referat frå rådsmøte ved Institutt for framandspråk

Referatet er sendt ut til alle som deltok på instituttrådsmøtet, og eventuelle merknader må sendeast arve.uthaug@if.uib.no seinast 10. oktober 2010.

Møtedato: 29. september 2010

Til stades:

Frå gruppe A: Margareth Hagen, Leiv Egil Breivik, Kjetil B. Henjum, Kevin McCafferty, Margery Vibe Skagen og Synnøve Rosales.

Frå gruppe B: Espen Ingebrigtsen.

Frå gruppe C: Jan A. Johansen.

Frå gruppe D: Charlotte Sognæs, Helene Margaretha Myrdahl og Claudia Förster Hegrenæs.

Administrasjonssjef Arve Kjell Uthaug møtte som referent.

Sak 1 – godkjenning av innkalling og sakliste

Breivik ønskte dei nye studentrepresentantane velkomne. Innkallinga og saklista vart godkjende utan merknader.

Sak 2 – godkjenning av referatet frå rådsmøtet 16. juni 2010

Godkjent utan merknader.

Sak 3 – orienteringssaker

- A. Uthaug orienterte om valet av nye medlemar frå gruppe B og D til instituttrådet.
- B. Breivik orienterte om tildelinga av støtte frå Bergens forskningsstiftelse til prosjektet *Modernism & Christianity*. Eigendelen til universitetet er i hovudsak to stipendiatstillingar. Prosjektet startar opp 1. januar 2011. Det vart orientert om søknaden i instituttrådet 24. februar i år (sak 5).
- C. Breivik orienterte om utlysing og tilsetjing i nye stillingar i engelsk, japansk, russisk, latinamerikansk litteratur, fagdidaktikk og prosjektet *Modernism & Christianity*. Breivik understreka det gledelege i at spørsmålet om utlysingar er klarert av fakultetet såpass tidleg i semesteret og at IF i denne omgangen også har fått godt gjennomslag. Når det gjeld stillinga på arabisk, ventar vi framleis på endeleg avklaring om Shabo Talay vil ta imot stillinga.
- D. Det vart orientert kort om presentasjonen av språkfaga på eksternweben.
- E. Breivik orienterte om fakultetskonferansen på Voss 27. og 28. september 2010, der PhD-utdanninga sto i fokus. Dekanetet vil senda ut eit notat om forskarutdanninga på bakgrunn av konferansen.
- F. Evalueringa av instituttsamanslåinga ved HF er utsett inntil vidare, og vi ventar på ei avklaring av denne saka. Breivik delte ut kopi av brevet frå instituttleiarane til fakultetet om "Evaluering av instituttsammenslåingen ved Det humanistiske fakultet" (8.9.2010). Ei parallell spørjeundersøking mellom dei administrativt tilsette er godt i gang.
- G. Den eksisterande strategiplanen for instituttet gjeld for 2008-2010. Vi ventar på ein del andre viktige planar på høgare nivå ved universitetet, og det vert dessutan ei ny leiargruppe ved instituttet frå sommaren 2011. Det er derfor naturleg å utsetja arbeidet med strategiplan for IF til hausten 2011. Ingen kom med innvendingar mot at den noverande strategiplanen for instituttet i så fall kunne forlengast til ut 2011.

Sak 4 – Orientering om økonomien ved instituttet

Uthaug orienterte om dei ulike punkta i saksframlegget. Det blir lagt opp til ei ekstra utlysing i desember der folk kan søkja om forskingsmidlar frå instituttet til første delen av 2011. McCafferty foreslo at instituttet går over til to årlege søknadsfristar for støtte til forskning og publisering.

Vedtak (samrøystes): Rådet tek orienteringa om rekneskapen ved instituttet pr september 2010 til orientering. Instituttleiinga arbeider vidare med spørsmålet om framtida for påskjøningsmidlane for master- og PhD-studentar.

Spørsmålet om framtida for påskjøningsmidlane bør sendast til intern høyring ved instituttet og så leggjast fram for instituttrådet på ny.

Sak 5 – Høyring om framtida for Senter for mellomalderstudiar (CMS)

Instituttleiar Breivik kom med framlegg til visse justeringar i teksten

Vedtak (samrøystes): Rådet sluttar seg til utkastet frå instituttleiar til høyringsfråsegn om CMS med endringane instituttleiar la fram i møtet.

Den endelege versjonen av høyringsfråsegna er lagt ved referatet.

Sak 6 - Ymse

Ingen saker.

Leiv Egil Breivik,
instituttleiar

Arve Kjell Uthaug,
administrasjonssjef

Høyringsfråsegn frå IF om framtida for mellomalderforskinga ved UiB etter 2012

Senter for mellomaldersstudiar (CMS) sluttar som SFF 31. desember 2012 etter ein funksjonsperiode på ti år. I brev av 15.06.2010 seier dekanen at "[d]et er behov for å starte en prosess med tanke på hvordan middelalderforskningen skal videreføres ved fakultetet og Universitetet i Bergen når denne perioden opphører." Han bed om innspel til dette, med utgangspunkt i eit vedlagt notat frå CMS.

I denne høyringsfråsegna vil vi kome med nokre prinsipielle synspunkt på SFF-ordninga og korleis mellomalderforskinga ved UiB skal vidareførast etter finansieringsperioden.

CMS sin faglege profil har vore perifer i høve til primærverksemdene ved IF. Det har vore lite kontakt mellom instituttet og senteret, som heller ikkje har rekruttert nokon frå faga våre. Likevel er denne saka viktig for IF. Etter det vi forstår, skal fakultetet utarbeide ein forskingsplan i nærmaste framtid. Det er derfor allereie no av stor interesse for alle miljø ved fakultetet kva område som vert prioriterte og kva prinsipp som vert lagde til grunn for ei slik prioritering. Fakultetet har ikkje bestemt at mellomalderforsking skal vere eit prioritert satsingsområde framfor andre forskingsfelt. Dette må eventuelt kome som ein konklusjon av ein gjennomarbeidd forskingsstrategi.

Den norske ordninga med SFF skal fremje grunnleggjande forskning på høgt internasjonalt nivå ved hjelp av romsleg, langsiktig finansiering, samt styrkje internasjonalisering og forskarutdanning. NIFU Step har gjennomført ei evaluering av SFF-ordninga på oppdrag av NFR. Evalueringsrapporten vart publisert 13.09.2010 og konkluderer med at ordninga stort sett har vore vellukka (jf. *Evaluation of Added Value and Financial Aspects. The Norwegian Centre of Excellence Scheme*). Særleg har ordninga lukkast i å fremje forskarrekuttering og i å forsterke internasjonaliseringa av norsk forskning. Ho har òg medverka til meir nasjonalt og internasjonalt samarbeid. CMS sitt notat peikar på at dette er område der senteret har lukkast.

Det er viktig å ha denne evalueringsrapporten som bakteppe når ein diskuterer CMS. Minst like viktig er det å hugse på at CMS og dei andre sentra innanfor denne ordninga vart oppretta for ein tidsavgrensa periode. Dette har heile tida vore ein føresetnad. NFR har frå dag éin presisert at vertsinstitusjonane skal ta ansvaret for verksemda ved sentra når SFF-perioden er over. Dette inneber ikkje at vertsinstitusjonane har plikt til å syte for at sentra skal halde fram med å eksistere qua senter. Vi meiner derfor at det ikkje er grunnlag fort å snakke om "utformingen av CMS' fremtidige profil" og "CMS både før og etter 2012" (CMS sitt notat, s. 3). Etter 2012 vil den eksterne finansieringa av CMS falle bort. Vi meiner at det generelt er lite tilrådeleg at SFF skal vidareførast som frie senter etter avslutta periode. Når det gjeld CMS ville ei slik vidareføring vere spesielt uheldig. Dersom HF skulle bidra til finansieringa av CMS etter 2012, ville dette ramme den øvrige forskingsaktiviteten ved HF på ein uheldig måte. I tillegg til CMS finst det sterke og internasjonalt profilerte forskingsmiljø ved fakultetet. I denne samanhengen er det òg verdt å merke seg at evalueringsrapporten om SFF rår til at det ikkje vert kravd økonomisk støtte frå vertsinstitusjonane utover SFF-perioden (s. 14):

Host institutions' priorities and willingness to support CoEs are vital to their success. When selecting CoEs, the expected lasting values of the centres should be part of the assessments: host commitments to allocating internal resources after the CoE period should not be required.

Korleis verdifull kompetanse og forskning skal takast vare på etter SFF-perioden er sjølvsagt eit viktig spørsmål. Etter vårt syn er den beste løysinga å integrere mellomalderforskinga i den ordinære drifta ved fakultetet, på linje med anna forskning. Dette kan gjerast ved å danne nye forskargrupper eller å bruke forskargrupper som alt er etablerte. Dei faste vitskaplege stillingane ved CMS børførast tilbake til fagmiljøa og få vanleg undervisningsplikt. Dette vil styrkje den forskingsbaserte undervisninga til eit vitktig og tradisjonsrikt felt innanfor humaniora.